

兀兀不修善 騰騰不造惡 寂寂斷見聞 蕩蕩心無著

師說偈已·端坐至三更·忽謂門人曰·吾行矣·奄然遷化·於時異香滿室·白虹屬地·林木變白·禽獸哀鳴·十一月廣韶新三郡官僚洎門人縑白爭迎真身·莫決所之·乃焚香禱曰·香煙指處·師所歸焉·時香煙直貫曹溪·十一月十三日·遷神龕併所傳衣鉢而回·次年七月二十五日出龕·弟子方辯以香泥上之·門人憶念取首之記·遂先以鐵葉漆布固護師頸入塔·忽於塔內白光出現·直上衝天·三日始散·韶州奏聞·奉敕立碑紀師道行·師春秋七十有六·年二十四傳衣·三十九祝髮·說法利生·三十七載·得旨嗣法者·四十三人·悟道超凡者·莫知其數·達磨所傳信衣<sup>④</sup>·中宗賜磨衲寶鉢·及方辯塑師真相·并道具等·

主塔侍者尸之·永鎮寶林道場·流傳壇經·以顯宗旨·興隆三寶·普利羣生者·

### 重鈔曹溪原本法寶壇經緣起

余家藏有萬曆元年癸酉李見羅先生重刻曹溪法寶壇經原本一帙。先居士秀川公手澤存焉。其本之善。段絡渾成。理趣周匝。視諸方刻本絕異。童習迄今。珍逾拱璧。今夏攜過研山。偕道一主人展閱。適有楞嚴經坊所刻方冊壇經在案。取一對之。則竄易顛倒。增減刪改。大背謬於原本。未有如是極者。蓋至元辛卯元僧宗寶改本。而徑山寂照菴於萬曆己酉刊行者也。夫佛門宗印。一絲不得走移。祖師言句。一字不容增減。壇經開頓教門。五宗之所自出。固佛祖心髓也。可竄易乎。可顛倒乎。可增減刪改乎。自至元迄今。三百餘年矣。即萬曆己酉迄今。亦四十四年矣。東南所行壇經。罕見曹溪原本。概多宗寶方冊。方冊改本

之雲霧不除。曹溪原本之杲日青霄何從見仰。洵可悲可痛。必先商流通原本。方可徐議銷毀改本也。道一主人護持祖命。念切救頭。當以原本立付剗。復屬余字櫛句比。詳明楷定。以告諸方。余非樂為索瘢。要惟千秋法寶。明晦攸關。何敢安於襲舛。竊謂宗寶之自用自專。大舛大錯。當以佛法四謗定之。佛祖建立一切法。後人增一字為增益謗。減一字為減損謗。紊一字為戲論謗。背一字為相違謗。四謗不除。即百非俱起。退眾生心。墮無間罪業。不通懺悔矣。宗寶之於壇經。按之四謗。實無所不有。數其大端。更竄標目。割裂文義。顛倒段絡。刪改字句。其膽甚狂。其目甚昧。安得再遲鳴鼓之攻哉。攷祖二十四傳衣。三十九祝髮。說法利生三十七載。門人法海等錄為壇經。然壇

經付囑流通。文中載祖將順世時。示門人法海等曰我於大梵寺說法以至於今。抄錄流行。目曰法寶壇經。汝等守護。遞相傳授。據此。則法寶壇經四字。為祖所自立。抄錄雖屬門人。全文實祖自鑒定矣。可一字更易耶。大藏壇經不載品目。曹溪原本。則分悟法傳衣第一。釋功德淨土第二。定慧一體第三。教授坐禪第四。傳香懺悔第五。參請機緣第六。南頓北漸第七。唐朝徵詔第八。法門對示第九。付囑流通第十。此十目中。目各四字。按之全文。字字具有原委着落。即非祖所自立。必當時得法弟子如行思懷讓親炙門人如法海神會等之所製造。非唐以後人臆置明矣。可恣臆割裂耶。今宗寶之改本標目。則盡改四字為二字。行由第一。般若第二。疑問第三。定慧第四。坐禪第五。懺

悔第六。機緣第七。頓漸第八。宣詔第九。付囑第十。按於全文。便不賅不括而無原委。不彰不明而無着落。如山無來脉。水無來源。一望而神氣索然矣。非減損謗與相違謗兼有之者耶。此大頭顱之最舛謬也。載將逐段血脉條分縷析之。如悟法傳衣第一。大師一日所說也。宗寶妄嫌繁長。割截上半行由得法事意為行由第一。於原文末增出一眾聞法歡喜作禮而退十字以結之。是無尾生尾也。割截下半說摩訶般若波羅蜜法為般若第二。於原文上增出次日韋使君請益師陞座告大眾曰十四字以始之。是無頭安頭也。夫一日所說法。可截為兩日乎。若以繁長。佛七日演華嚴竟。傅大士一語講經竟。繁乎不繁乎。悟法傳衣。悟何法。正悟摩訶般若波羅蜜但用此心直了成佛之法也。分一篇為

兩截。則悟法何安頓乎。前半但說行由。尚未說法。何得遽著著一眾聞法歡喜作禮而退之語乎。此皆割裂不通。首犯相違戲論兩大謗者。因一節差錯。遂節節差錯矣。下此移釋功德淨土第二分作疑問第三也。夫功德。掃有為功德。顯自性功德也。淨土。掃十萬八千西方。顯自性西方也。直指人心見性成佛之旨。攝盡無餘。單標疑問二字。瑣細可得諮識。何能賅此極大因緣。此減損謗也。移定慧一體第三分作定慧第四也。定慧一體者。指定慧與一行三昧與正教無有頓漸為一體也。祖師文字。正以錯綜愈妙。定慧等學。即是一行三昧。一行三昧。即是本性頓教。宗寶執泥定慧二字。遂將一分分為三截。移出一行三昧後善知識定慧猶如何等至亦復如是十句四十六字。作定慧一截。

下一行三昧及正教無有頓漸。各增師示眾云四字。共增八字。分為二截。三截判然。定慧則定慧矣。一體成何一體乎。割剝聖文一篇貫串。鼎峙橫分。使血脉隔別不通。增益戲論相違謗三備之矣。移教授坐禪第四分作坐禪第五也。文本一篇。截成兩段。去此門坐禪上轉文一然字。直云此門坐禪元不着心至却障道也。後一段移作前一段。而削去淨名經云三句計十二字。師示眾云善知識何名坐禪至自成佛道前一段移作後一段。既顛倒聖文矣。淨名經與菩薩戒經二經文。乃教授坐禪公據。承上貫下之文。削淨名。存菩薩戒。輪翼不能偏運。豈非腰截經文耶。減損戲論相違謗亦具足焉。移傳香懺悔第五分作懺悔第六也。此一大分五香四弘誓無相三皈依戒一體三身自性佛內有四大段絡。

合無相頌為五。得不分截幸矣。但懺悔先之傳香。正以傳戒香定香慧香解脫香解脫知見香五分香。故此懺悔足賅四弘誓等大法也。單提懺悔二字。人天小果何所不可名乎。非灼然減損謗乎。移參請機緣第六分作機緣第七也。其尤謬者。宗寶自跋有云。取其本校讎。訛者正之。略者詳之。復增入弟子請益機緣。庶幾學者得盡曹溪之旨。夫弟子請益機緣。六祖被機點化說法利生之大。如法達之於法華。智通之於楞伽。志道志徹尼無盡藏之於涅槃。闍如來大經旨趣之大者。青原之不落階級。南嶽之修證不無污染不得。永嘉之一宿覺。闍五宗要領參取無生綱宗之大者。當日壇經問答。公案昭然。宗寶猥云增入。夫增入者。本無而有。本少而多之謂也。宗寶不幾貧劫剽財遽稱陶頓耶。大妄語

增益謗之謂何。移南頓北漸第七分作頓漸第八也。南北伊何。南能北秀也。南以本來無一物為宗。是名曰頓。北以時時勤拂拭為宗。是名曰漸。北秀心服南能。而北之學徒忌祖傳衣得法。笑南不識一字。秀因以獨得無師智曉之。分中數條。不離此指。故曰南北頓漸。今離南北而但曰頓漸。不幾顧一指而失肩背與。此大減損謗也。移唐朝徵詔第八分作宣詔第九也。夫徵者。徵祖赴京供養請益也。爰有內侍薛簡詔迎問答表奏祖語。及祖上表辭疾。詔從師便。并奉磨衲袈裟。勅詔州修飾寶林寺宇。併賜新州舊居為國恩寺之事。蓋其時則天登伽。中宗癡豎宸極淫穢。祖不肯同安秀二師輕出。乃祖師自重出處。但曰宣詔。宣何詔乎。不抹煞六祖之高潔乎。是又減損謗之大者。將法門對示第

九付囑流通第十兩分扭作一分改為付囑第十也。義尤可駭。夫法門對示。以三科對示十八界。以十八正祛十八邪。可掩抹耶。三十六對。天然佛法。可瞞肝儻侷耶。自太極元年壬子七月以下思理檝歸新州示最後語。方是付囑。法門對示。全屬說法。不得混為付囑也。初截一分為兩。是斷鶴脛使短。末紐兩分為一。是續鳧頸使長。戲論之謗。至於此極。一質原本。罪過顯然。此各段絡之大錯也。又有關係血脉天然呼吸照應。妄行增減。窒礙壅淤。為開門見山大錯之昭彰者。曹溪原本開章悟法傳衣第一文中。大師告曰下。有善知識總淨心念摩訶般若波羅蜜大師良久復告眾曰二十二字。此二十二字。與後文我今為說般若波羅蜜法汝等各得智慧一段。呼應極其喫緊。今直云大師告眾曰

善知識菩提自性云云。此上刪去總淨心念摩訶般若波羅蜜良久復告十八字。能一聞經下。上有云應無所住而生其心十字。與後文祖以袈裟遮圍不令人見為說金剛經至應無所住而生其心惠能言下大悟一段。呼應極其喫緊。今刪去云字下十字。前段良久二字。從上佛祖說法。以楔出楔。俱用此二字為鞭影。與後文祖出坐盤石上為惠明說法明良久二字。又一呼一應。極其喫緊。况後段應無所住而生其心一句。的係六祖悟由。宗寶不知何見。擅行刪去原文。使後文之述盡失精彩。如此慧命攸關。盡情抹煞。豈非滅所必不可減。為滅損謗之重大。不通懺悔者與。祖三鼓入室得法何期自性十句下。原本云祖知悟本性即名丈夫天人師佛。只十三字。此當下印許。擊石閃電。應弦倒之箭鋒機

也。宗寶又不知何見。妄增謂慧能曰不識本心學法無益若識本心見自本性二十字。機語遲滯。箭鋒落之繞矣。虛空打槩。平地骨堆。一線有差。白雲千里。豈非增所必不可增。為增益謗之重大。不通懺悔者與。他若原本有我亦要誦此結來生緣同生佛地十三字。改作細註。去同生佛地四字。又原本有五祖歸數日不上堂至眾乃知焉四十三字。亦改作細註。又原本有明回至嶺下至咸以為然二十八字。亦改作細註。咸以為然下。有惠明後改道明避師上字十字。原本特作細註。又原本中細註更有四處。共長短五段。則知細註乃後人增益。不得以細註混失正文。甚明也。傳香懺悔第五分中。原本我有一無相偈若能誦持。訛作師持。參請機緣第六分中。原本法海參祖即心即佛偈定慧等等。

訛作等持。此亦減損相違謗也。懷讓參祖文。原本有西天般若至不須速說二十七字。今添細註云一本無此二十七字。夫馬駒踏殺天下。此西天般若多羅預識。佛祖觀未來際。如觀掌中菴摩羅果。此而為疑信有無語。則供養十方羅漢僧與逢懷止遇會藏之識。俱浪蕩語矣。智隍參祖文。有汝但心如至無不定時也三十五字。今細註云。一本無此三十五字。止云師憫其遠來遂垂開決。不知大法不可以輕心慢心求。至人為法忘軀。立雪斷臂。腰石舂米。即榜樣。何有於路之遠來。三十六字開示大。定最明。若無此。則開示更屬何語。不反滋千古不決之疑乎。此等則增益戲論謗之大者。方辯參祖文。原本至人天福田止。今添入師仍以衣酬之細字四行計六十九字。夫方辯固以香泥塗師肉身者。

塵衣事屬不經。原本所無。何得妄混。付囑流通第十分末文。達磨所傳信衣中宗賜磨衲寶鉢及方辯塑師真相并道具等。原本有主塔侍者尸之六字。尸。主也。此主塔侍者。上足令韜也。令韜即對張淨滿處分事為柳守嘉歎者。宗寶妄行削此一句。於禪門築室獨居之賢。湮沉本末矣。此盡四謗紛紜百非俱起之大錯也。宗寶於宗門向上佛祖慧命事。全然望洋。再讀其跋語。有曰。余初入道。有感於斯。續見三本不同。互有得失。其板亦已漫滅。因取其本校讎。訛者正之。畧者詳之。云云。夫壇經非文字。乃祖意佛心。曰初入道有感於斯。已為悠悠浮泛大不中理之談矣。訛者正之。是其減損。畧者詳之。是其增益。曰三本不同。曰其板漫滅。是其明知信臆改竄相違戲論亦有不安於心。以

數語為逋逃重業之飾辭也。又見陸五臺先生有刻壇經一跋云。壇經乃曹溪弟子法海集。元僧宗寶哀益成書。微言具在。惟科門對法辭多不倫。存之。問知道者。是五臺亦未得見曹溪原本。而曰哀益成書。曰科門對法不倫。曰存之問知道。固閱之不安於心。危疑不定之微詞也。或者曰。破句讀楞嚴。不妨得悟。近且有為壇經節文者矣。何子斷斷不置。如老吏勘獄之為。余應之曰。悲乎。子之言。祖庭草滿。佛日沉山。宗燈熄燄。干城正法之士。雖捐頭目腦髓以爭。烏能已也。壇經五宗宗印。流出現量祖心。如起世界之山河既定。為巨室之梁柱已安。宗寶之徒。不知妄作。乃以螢火上藐太陽。可任其存留。作舞文法寶之俑。開迷誤眾生之罪耶。古德錯下轉語。罰作野狐。昭明科分

金剛·苦受地獄·壇經宗趣·無欠無餘·有何有餘可節·有何不足可文·此亦宗寶之盲盲相引者·六祖常寂光中·其安之耶·今與道一主人矢願梓傳·其經坊方冊舊板·願為文明告六祖·公請銷毀·免留為紫朱苗莠之殃·此六祖放大光明之日·余得藉以慰先居士夙心·成一大時節因緣·龍天實鑒之矣·玄默執徐且月既望秀水參學曹溪弟子西池王起隆薰沐敬識

### 重訂曹溪法寶壇經原本跋

不慧弟子福徵·默自揣·歷劫鈍根·無能一超直入·自追隨曹溪憨祖於寂照宗鏡之間·親炙最深·以至覲面大善知識·不知幾何人·終未曉何者為勾當公案·上至曹溪盧祖壇經·每一展誦·但知欽其寶·全莫探其奧·惟日從

眼耳鼻舌語言文字中作鬼窟活計耳·此如語實語不誑語也·既從南雍休沐里居·惟日與止菴遐道人鞭轡參道人兩公作落草盤桓事·一日遐道人奉其先秀川公所藏法寶壇經曹溪原本至研山敝廬中·不慧相與讀之·見開口豎義第一句曰·善知識總淨心念摩訶般若波羅蜜大師良久乃復告眾云云·一時梵語華言·以至威音王前這着子·早已和盤托出·回思疇昔所習壇經·絕無此段語句·駭歎之際·輒取徑山化城所刻楞嚴經坊所行方冊對閱之·則應無所住而生其心一句悟因·亦行刪去·止云一聞經語·竟不曉所聞云何·僅述後文·早失呼應·如許擅筆訾謬·不堪屈指·若夫更竄標題·去四字作兩字·則失本來面目·顛倒段絡·或離一為兩·或合兩為一·則斷次第血脉·刪改字句·或減有而

無·或增無而有·或更大書作細註·或添細註混大書·則塗糊全部精光·幾於青蠅玷壁矣·今藏本前擅題云·風旛報恩光孝禪寺住持嗣祖比丘宗寶編·後跋略云·余初入道續見三本不同·互有得失·其板亦已漫滅·因取其本校讎·訛者正之·略者詳之·復增入弟子請益機緣云云·又題至元辛卯夏南海釋宗寶跋·即此數語·自供顛倒壇經罪案·已無遁形·計自唐代太極壬子迄元代至元辛卯已歷五百八十四年·宗寶不過住持光孝·非關得法禪和·何得妄稱嗣祖·只今曹溪法寶壇經原本完好現在·明代成化七年辛卯重刻於曹溪·有御製序·萬曆元年癸酉李見羅先生載刻有序·萬曆四十四年丙辰本師憨祖從曹溪至匡廬·復刻於法雲寺·至今匡山誦習·悉遵曹溪原本·不行宗寶改本·何

得妄稱當時板已漫滅·至煩訛略增詳·且不稱校而稱編·妄筆意造·抑何擅也·無乃蔑視無上法寶·僅作語言文字觀乎·佛祖慧命·不離語言文字·不即語言文字·必使一句一字無訛·庶幾無字無句得證·如楞嚴一經破臂西來江心洗出惟字血淨盡無訛故破句讀時可悟·壇經為曹溪法滴·此方大宗·自非改本魔翳盡除·安得原文祖日重朗·止菴遐道人相與研山休夏·殫七日心力·為之字櫛句比·憑藉天台正諦·討論曹溪嫡傳·義例方成·而輟轍參道人適至·以骨髓兒孫·得見祖禰完璧正印·不勝欽喜讚歎·遂與道一主人商略推敲·竟席卒業·隨屬侍間學人莊臨之錄藁·爰付剞劂·圓就不朽勝因·的是一夕團圓話·千秋莫大緣·此順治壬辰六月十二日事也·因念禮記一經中·中庸第三

十一·大學第四十二·大學即中庸下篇·次序盡然·現出監板十三經最易攷據·妄為宋儒割裂顛倒·致以大學先中庸·甚且先論語·而文中章句各別·紛紜雜出·自禮記監本鄭玄古本行世·大學及朱熹今本即程頤外本甚有程灝自定大學別本賈逵虞松石經本·即兩程已自角立諸家從何會通·儒道反始還原·必遵開成鄭本·已定入見聖編行世·不復更竄一句一字矣·至如壇經諸本殺訛·甚有節文妄作·而坊冊流通·關係尤大·反始還原·必遵曹溪原本·始可息羣啄而斬葛藤·道一居士志在會通孔佛門庭·歸併宗教脉絡·即中庸直指大學決疑·先後較然·其義並得本師慙祖啓發·況今曹溪肉身相對·覲面親炙盧祖者·而可不流傳其匡山定本·俾佛祖宗教梵語唐言統歸一貫乎·藉手年

譜疏竟·重了大事因緣·眼前隻字不移·究竟言語道斷·無負發真歸元虛空消隕之義云爾·

曹溪受法弟子福徵譚貞默槃談謹識

### 讀壇經原本頌

吾禾西池道人·胸藏二酉·教通三乘·掃菴道人手著萬牒·旨歸道一·不肖參·筭無片楮·腹無隻字·掃道人為曹溪肉身慙祖法子·參忝曹溪大鑒聞孫·乃慙祖年譜壇經原本俱從西池藏中傳布·掃道人手疏年譜·訂正壇經·悉付剗刪·流通薄海內外·參惟得而誦讀之·不能如兩道人興波作浪於曹源活水中·克家之謂何·愧忤忻忤·爰申讚頌云·西祖單傳意·墮在曹溪水·浸殺天下人·偷心誰不死·愧余六十三·未解啓口齒·偶過著作堂·得遇西池

氏。罪彼宗寶僧。示我長白紙。古本及時冊。一一都被視。朱紫久混淆。異同難定止。眾目相諦觀。十手來共指。千年陳葛藤。今日重新起。曹水與慈山。肉身無彼此。年譜與壇經。面目恰相似。譜喜手疏成。經說正當剖。四謗顯其非。增減奪一是。黑豆未生芽。二者從何擬。好個真消息。古今無異旨。直下絕殺訛。不須翹足踈。翻怪老臊鬚。無事中生事。頭正兼尾正。僧史耀青史。

順治壬辰季夏曹溪法孫轆轤道人嚴大參合十題

### 校勘表

頁次	行數	數字	說	明	頁次	行數	數字	說	明
二	三	廿五	囙是。囙作有。		十三	三	十一	囙能於東山。囙無此四字。	
二	七	廿二	囙親。囙作違。		十三	三	廿一	囙受盡。囙無此二字。	
三	二	十八	囙教作何務。囙作作何所務。		十五	一〇	一	囙似。囙作如。	
三	三	九	囙更勿。囙作勿更。		十七	五	八	囙性成佛道。囙誤脫。	
三	六	十九	囙祖。囙作師。		廿七	八	十七	囙無。囙莫。	
三	十一	十五	囙若如此者輪刀上陣亦得見之。囙有「古德云譬如輪刀上陣不問如何若何喻得的人見機而作不在言句也」二十八字。		廿九	七	六	囙却。囙無此字。	
四	六	七	囙心。囙作夫。		三五	二	九	囙告眾。囙無此二字。	
五	十一	十九	囙言。囙作曰。		三六	六	八	囙真正。囙作正直。	
九	七	一	囙汝。囙無。		三九	五	廿三	囙慈悲化為菩薩。囙慈悲化為菩薩。智慧化為菩薩。	
一〇	三	三	囙少病少惱。囙作少惱少病。		四〇	七	四	囙惡。囙作毒。	
一〇	八	五	囙行者。囙行者云云。		四二	八	十一	「等等」一作「等持」囙持。囙誤待。	
一〇	十二	廿一	囙云。囙作曰。		四四	二	十八	囙文。囙無此字。	
十一	六	十九	「惠明」後改「道明」。避師上字。		四六	一	十一	「誦經久不明」一作「誦久不明已」。	



### 心王銘

傅大士

觀心空王·玄妙難測·無形無相·有大神力·能滅千災·  
成就萬德·體性雖空·能施法則·觀之無形·呼之有聲·  
為大法將·心戒傳經·水中鹽味·色裏膠清·決定是有·  
不見其形·心王亦爾·身內居停·面門出入·應物隨情·  
自在無礙·所作皆成·了本識心·識心見佛·是心是佛·  
是佛是心·念念佛心·佛心念佛·欲得早成·戒心自律·  
淨律淨心·心即是佛·除此心王·更無別佛·欲求成佛·  
莫染一物·心性雖空·貪瞋體實·入此法門·端坐成佛·  
到彼岸已·得波羅蜜·慕道真士·自觀自心·知佛在內·  
不向外尋·即心即佛·即佛即心·心明識佛·曉了識心·  
離心非佛·離佛非心·非佛莫測·無所堪任·執空滯寂·

於此漂沉·諸佛菩薩·非此安心·明心大士·悟此玄音·  
身心性妙·用無更改·是故智者·放心自在·莫言心王·  
空無體性·能使色身·作邪作正·非有非無·隱顯不定·  
心性離空·能凡能聖·是故相勸·好自防慎·剎那造作·  
還復漂沉·清淨心智·如世萬金·般若法藏·並在身心·  
無為法寶·非淺非深·諸佛菩薩·了此本心·有緣遇者·  
非去來今·

### 信心銘

三祖僧璨大師

至道無難·唯嫌揀擇·但莫憎愛·洞然明白·毫釐有差·  
天地懸隔·欲得現前·莫存順逆·違順相爭·是為心病·  
不識玄旨·徒勞念靜·圓同太虛·無欠無餘·良由取捨·  
所以不如·莫逐有緣·勿住空忍·一種平懷·泯然自盡·  
止動歸止·止更彌動·唯滯兩邊·寧知一種·一種不通·  
兩處失功·遣有沒有·從空背空·多言多慮·轉不相應·  
絕言絕慮·無處不通·歸根得旨·隨照失宗·須臾返照·  
勝却前空·前空轉變·皆由妄見·不用求真·唯須息見·  
二見不住·慎莫追尋·才有是非·紛然失心·二由一有·  
一亦莫守·一心不生·萬法無咎·無咎無法·不生不心·  
能隨境滅·境逐能沉·境由能境·能由境能·欲知兩段·

元是一空·一空同兩·齊含萬象·不見精麤·寧有偏黨·  
大道體寬·無易無難·小見狐疑·轉急轉遲·執之失度·  
必入邪路·放之自然·體無去住·任性合道·逍遙絕惱·  
繫念乖真·昏沉不好·不好勞神·何用疎親·欲取一乘·  
勿惡六塵·六塵不惡·還同正覺·智者無為·愚人自縛·  
法無異法·妄自愛著·將心用心·豈非大錯·迷生寂亂·  
悟無好惡·一切二邊·良由斟酌·夢幻虛華·何勞把握·  
得失是非·一時放却·眼若不睡·諸夢自除·心若不異·  
萬法一如·一如體玄·兀爾忘緣·萬法齊觀·歸復自然·  
泯其所以·不可方比·止動無動·動止無止·兩既不成·  
一何有爾·究竟窮極·不存軌則·契心平等·所作俱息·  
狐疑盡淨·正信調直·一切不留·無可記憶·虛明自照·

不勞心力。非思量處。識情難測。真如法界。無他無自。要急相應。唯言不二。不二皆同。無不包容。十方智者。皆入此宗。宗非促延。一念萬年。無在不在。十方目前。極小同大。忘絕境界。極大同小。不見邊表。有即是無。無即是。有。若不如此。必不須守。一即一切。一切即一。但能如是。何慮不畢。信心不二。不二信心。言語道斷。非去來今。

### 心銘

牛頭山初祖法融禪師

心性不生。何須知見。本無一法。誰論熏鍊。往返無端。追尋不見。一切莫作。明寂自現。前際如空。知處迷宗。分明照境。隨照冥蒙。一心有滯。諸法不通。去來自爾。胡假推窮。生無生相。生照一同。欲得心淨。無心用功。縱橫無照。最為微妙。知法無知。無知知要。將心守靜。猶未離病。生死忘懷。即是本性。至理無詮。非解非纏。靈通應物。常在目前。目前無物。無物宛然。不勞智鑒。體自虛玄。念起念滅。前後無別。後念不生。前念自絕。三世無物。無心無佛。眾生無心。依無心出。分別凡聖。煩惱轉盛。計校乖常。求真背正。雙泯對治。湛然明淨。不須功巧。守嬰兒行。惺惺了知。見網轉彌。寂寂無見。

暗室不移。惺惺無妄。寂寂明亮。萬象常真。森羅一相。去來坐立。一切莫執。決定無方。誰為出入。無合無散。不遲不疾。明寂自然。不可言及。心無異心。不斷貪淫。性空自離。任運浮沉。非清非濁。非淺非深。本來非古。見在非今。見在無住。見在本心。本來不存。本來即今。菩提本有。不須用守。煩惱本無。不須用除。靈知自照。萬法歸如。無歸無受。絕觀忘守。四德不生。三身本有。六根對境。分別非識。一心無妄。萬緣調直。心性本齊。同居不攜。無生順物。隨處幽棲。覺由不覺。即覺無覺。得失兩邊。誰論好惡。一切有為。本無造作。知心不心。無病無藥。迷時捨事。悟罷非異。本無可取。今何用棄。謂有魔興。言空象備。莫滅凡情。唯教息意。意無心滅。

心無行絕。不用證空。自然明徹。滅盡生死。冥心入理。開目見相。心隨境起。心處無境。境處無心。將心滅境。彼此由侵。心寂境如。不遣不拘。境隨心滅。心隨境無。兩處不生。寂靜虛明。菩提影現。心水常清。德性如愚。不立親疎。寵辱不變。不擇所居。諸緣頓息。一切不憶。永日如夜。永夜如日。外似頑嚚。內心虛直。對境不動。有力大人。無人無見。無見常現。通達一切。未嘗不徧。思惟轉昏。汨亂精魂。將心止動。轉止轉奔。萬法無所。唯有一門。不入不出。非靜非喧。聲聞緣覺。智不能論。實無一物。妙智獨存。本際虛沖。非心所窮。正覺無覺。真空不空。三世諸佛。皆乘此宗。此宗毫末。沙界含容。一切莫顧。安心無處。無處安心。虛明自露。寂靜不生。

放曠縱橫。所作無滯。去住皆平。慧日寂寂。定光明明。  
照無相苑。朗涅槃城。諸緣忘畢。詮神定質。不起法座。  
安眠虛室。樂道恬然。優遊真實。無為無得。依無自出。  
四等六度。同一乘路。心若不生。法無差互。知生無生。  
現前常住。智者方知。非言詮悟。

### 息心銘

僧亡名

法界有如意寶人焉。久緘其身。銘其膺曰。古之攝心人也。  
戒之哉。戒之哉。無多慮。無多知。多知多事。不如息意。  
多慮多失。不如守一。慮多志散。知多心亂。心亂生惱。  
志散妨道。勿謂何傷。其苦攸長。勿言何畏。其禍鼎沸。  
滴水不停。四海將盈。纖塵不拂。五嶽將成。防未在本。  
雖小不輕。關爾七竅。閉爾六情。莫現於色。莫聽於聲。  
聞聲者聾。見色者盲。一文一藝。空中小蚋。一伎一能。  
日下孤燈。英賢才藝。是為愚蔽。捨棄淳朴。耽溺淫麗。  
識馬易奔。心猿難制。神既勞役。形必損斃。邪行終迷。  
修途永泥。莫貴才能。日益昏瞶。誇拙羨巧。其德不弘。  
名厚行薄。其高速崩。內懷憍伐。外致怨憎。或談於口。

或書於手。邀人令譽。亦孔之醜。凡謂之吉。聖謂之咎。賞翫暫時。悲哀長久。畏影畏跡。逾遠逾極。端坐樹陰。跡滅影沉。厭生患老。隨思隨造。心想若滅。生死長絕。不死不生。無相無名。一道虛寂。萬物齊平。何貴何賤。何辱何榮。何勝何劣。何重何輕。澄天愧淨。皎日慙明。安夫岱嶺。同彼金城。敬貽賢哲。斯道利貞。

### 菩提達磨略辯大乘入道四行

法師者。西域南天竺國是大婆羅門國王第三之子也。神慧疎朗。聞皆曉悟。志存摩訶衍道。故捨素從緇。紹隆聖種。冥心虛寂。通鑒世事。內外俱明。德超世表。悲悔邊隅。正教陵替。遂能遠涉山海。遊化漢魏。忘心之士。莫不歸信。存見之流。乃生譏謗。於時唯有道育慧可此二沙門。年雖後生。俊志高遠。幸逢法師。事之數載。虔恭諮啓。善蒙師意。法師感其精誠。誨以真道。令如是安心。如是發行。如是順物。如是方便。此是大乘安心之法。令無錯謬。如是安心者。壁觀。如是發行者。四行。如是順物者。防護譏嫌。如是方便者。遣其不著。此略序所由云爾。夫入道多途。要而言之。不出二種。一是理入。二是行入。

者。謂藉教悟宗。深信含生同一真性。但為客塵妄想所覆。不能顯了。若也捨妄歸真。凝住壁觀。無自無他。凡聖等一。堅住不移。更不隨於文教。此即與理冥符。無有分別。寂然無為。名之理入。行人者。謂四行。其餘諸行悉入此中。何等四耶。一報冤行。二隨緣行。三無所求行。四稱法之行。云何報冤行。謂修道人若受苦時。當自念言。我從往昔無數劫中。棄本從末。流浪諸有。多起冤憎。違害無限。今雖無犯。是我宿殃。惡業果熟。非天非人所能見與。甘心忍受。都無冤訴。經云。逢苦不憂。何以故。識達故。此心生時。與理相應。體冤進道。故說言報冤行。二隨緣行者。眾生無我。並緣業所轉。苦樂齊受。皆從緣生。若得勝報榮譽等事。是我過去宿因所感。今方得之。

緣盡還無。何喜之有。得失從緣。心無增減。喜風不動。冥順於道。是故說言隨緣行也。三無所求行者。世人長迷。處處貪著。名之為求。智者悟真。理將俗反。安心無為。形隨運轉。萬有斯空。無所願樂。功德黑暗。常相隨逐。三界久居。猶如火宅。有身皆苦。誰得而安。了達此處。故捨諸有。息想無求。經云。有求皆苦。無求乃樂。判知無求。真為道行。故言無所求行也。四稱法行。性淨之理。目之為法。此理。眾相斯空。無染無著。無此無彼。經云。法無眾生。離眾生垢故。法無有我。離我垢故。智者若能信解此理。應當稱法而行。法體無慳。於身命財。行檀捨施。心無恚惜。達解二空。不倚不著。但為去垢。稱化眾生。而不取相。此為自行。復能利他。亦能莊嚴菩提之道。

檀施既爾。餘五亦然。為除妄想。修行六度而無所行。是為稱法行。

### 顯宗記

荷澤大師

無念為宗。無作為本。真空為體。妙有為用。夫真如無念。非想念而能知。實相無生。豈色心而能見。無念念者。即念真如。無生生者。即生實相。無住而住。常住涅槃。無行而行。即超彼岸。如如不動。動用無窮。念念無求。求本無念。菩提無得。淨五眼而了三身。般若無知。運六通而弘四智。是知即定無定。即慧無慧。即行無行。性等虛空。體同法界。六度自茲圓滿。道品於是無虧。是知我法體空。有無雙泯。心本無作。道常無念。無念無思。無求無得。不彼不此。不去不來。體悟三明。心通八解。功成十力。富有七珍。入不二門。獲一乘理。妙中之妙。即妙法身。天中之天。乃金剛慧。湛然常寂。應用無方。用而

常空。空而常用。用而不有。即是真空。空而不無。便成妙有。妙有即摩訶般若。真空即清淨涅槃。般若是涅槃之因。涅槃是般若之果。般若無見。能見涅槃。涅槃無生。能生般若。涅槃般若。名異體同。隨義立名。故云法無定相。涅槃能生般若。即名真佛法身。般若能建涅槃。故號如來知見。知即知心空寂。見即見性無生。知見分明。不一不異。故能動寂常妙。理事皆如。如即處處能通。達即理事無礙。六根不染。即定慧之功。六識不生。即如如之力。心如境謝。境滅心空。心境雙亡。體用不異。真如性淨。慧鑒無窮。如水分千月。能見聞覺知。見聞覺知而常空寂。空即無相。寂即無生。不被善惡所拘。不被靜亂所攝。不厭生死。不樂涅槃。無不能無。有不能有。行住坐

臥。心不動搖。一切時中。獲無所得。三世諸佛。教旨如斯。即菩薩慈悲。遞相傳受。自世尊滅後。西天二十八祖共傳無住之心。同說如來知見。至於達磨屆此為初。遞代相承。於今不絕。所傳祕教。要藉得人。如王髻珠。終不妄與。福德智慧二種莊嚴行解相應方能建立。衣為法信。法是衣宗。唯指衣法相傳。更無別法內傳心印。印契本心。外傳袈裟。將表宗旨。非衣不傳於法。非法不受於衣。衣是法信之衣。法是無生之法。無生即無虛妄。乃是空寂之心。知空寂而了法身。了法身而真解脫。

### 參同契

南嶽石頭和尚

竺土大僊心。東西密相付。人根有利鈍。道無南北祖。靈源明皎潔。枝派暗流注。執事元是迷。契理亦非悟。門門一切境。迴互不迴互。迴而更相涉。不爾依位住。色本殊質象。聲元異樂苦。暗合上中言。明明清濁句。四大性自復。如子得其母。火熱風動搖。水濕地堅固。眼色耳音聲。鼻香舌鹹醋。然依一一法。依根葉分布。本末須歸宗。尊卑用其語。當明中有暗。勿以暗相遇。當暗中有明。勿以明相覩。明暗各相對。比如前後步。萬物自有功。當言用及處。事存函蓋合。理應箭鋒拄。承言須會宗。勿自立規矩。觸目不會道。運足焉知路。進步非近遠。迷隔山河固。謹白參玄人。光陰莫虛度。

### 五臺山鎮國大師澄觀答皇太子問心要

至道本乎其心。心法本乎無住。無住心體。靈知不昧。性相寂然。包含德用。該攝內外。能深能廣。非有非空。不生不滅。無終無始。求之而不得。棄之而不離。迷現量則感苦紛然。悟真性則空明廓徹。雖即心即佛。唯證者方知。然有證有知。則慧日沉沒於有地。若無照無悟。則昏雲掩蔽於空門。若一念不生。則前後際斷。照體獨立。物我皆如。直造心源。無知無得。不取不捨。無對無修。然迷悟更依。真妄相待。若求真去妄。猶棄影勞形。若體妄即真。似處陰影滅。若無心忘照。則萬慮都捐。若任運寂知。則眾行爰起。放曠任其去住。靜鑒覺其源流。語默不失玄微。動靜未離法界。言止則雙亡知寂。論觀則雙照寂。

知。語證則不可示人。說理則非證不了。是以悟寂無寂。真知無知。以知寂不二之一心。契空有雙融之中道。無住無著。莫攝莫收。是非兩亡。能所雙絕。斯絕亦寂。則般若現前。般若非心外新生。智性乃本來具足。然本寂不能自現。實由般若之功。般若之與智性。翻覆相成。本智之與始修。實無兩體。雙亡正入。則妙覺圓明。始末該融。則因果交徹。心心作佛。無一心而非佛心。處處成道。無一塵而非佛國。故真妄物我。舉一全收。心佛眾生。渾然齊致。是知迷則人隨於法。法法萬差而人不同。悟則法隨於人。人人一智而融萬境。言窮慮絕。何果何因。體本寂寥。孰同孰異。唯忘懷虛朗。消息沖融。其猶透水月華。虛而可見。無心鑑象。照而常空矣。

### 坐禪箴

杭州五雲和尚

坐不拘身。禪非涉境。拘必乃疲。涉則非靜。不涉不拘。真光迫孤。六門齊應。萬行同敷。嗟爾初機。未達玄微。處沉隨掉。能所支離。不有權巧。胡為對治。驅策抑按。均調昏亂。息慮忘緣。乍同死漢。隨宜合開。靡專壁觀。馳想頗多。安那鉢那。沿流劍閣。無滯木鵝。如火得水。如病得醫。病瘳醫罷。火滅水傾。一念清淨。體寂常靈。是靈是寂。非靈非寂。是非迭生。犯過無極。前滅後興。還如步走。患乎不知。知則無咎。日由背夜。鏡奚照後。此則不然。圓明通透。照而不緣。寂而誰守。萬象瀛漚。太虛閃電。摧壞魔宮。衝倒佛殿。跛者得履。瞽者發見。法界塵寰。齊輪頓現。曠蕩郊廓。或坐或眠。既明方便。

乃號金僊。吾雖強說。爰符聖言。聖言何也。要假重宣。不動不禪。是無生禪。又云。若學諸三昧。是動非坐禪。心隨境界流。云何名為定。故知歷代祖。唯傳此一心。祖光既遠大。吾子幸堪任。聊述無言旨。乃曰坐禪箴。

### 證道歌

永嘉真覺大師

君不見。絕學無為閑道人。不除妄想不求真。無明實性即佛性。幻化空身即法身。法身覺了無一物。本源自性天真佛。五陰浮雲空去來。三毒水泡虛出沒。證實相。無人法。彼那滅却阿鼻業。若將妄語誑眾生。自招拔舌塵沙劫。頓覺了。如來禪。六度萬行體中圓。夢裏明明有六趣。覺後空空無大千。無罪福。無損益。寂滅性中莫問覓。比來塵鏡未曾磨。今日分明須剖析。誰無念。誰無生。若實無生無不生。喚取機關木人問。求佛施功早晚成。放四大。莫把捉。寂滅性中隨飲啄。諸行無常一切空。即是如來大圓覺。決定說。表真乘。有人不肯任情徵。直截根源佛所印。摘葉尋枝我不能。摩尼珠。人不識。如來藏裏親收得。

六般神用空不空。一顆圓光色非色。淨五眼。得五力。唯證乃知誰可測。鏡裏看形見不難。水中捉月爭拈得。常獨行。常獨步。達者同遊涅槃路。調古神清風自高。貌悴骨剛人不顧。窮釋子。口稱貧。實是身貧道不貧。貧則身常披縷褐。道即心藏無價珍。無價珍。用無盡。利物應時終不吝。三身四智體中圓。八解六通心地印。上士一決一切了。中下多聞多不信。但自懷中解垢衣。誰能向外誇精進。從他謗。任他非。把火燒天徒自疲。我聞恰似飲甘露。銷融頓入不思議。觀惡言。是功德。此則成吾善知識。不因訕謗起怨親。何表無生慈忍力。宗亦通。說亦通。定慧圓明不滯空。非但我今獨達了。河沙諸佛體皆同。師子吼。無畏說。百獸聞之皆腦裂。香象奔波失却威。天龍寂聽生

欣悅。遊江海。涉山川。尋師訪道為參禪。自從認得曹谿路。了知生死不相干。行亦禪。坐亦禪。語默動靜體安然。縱遇鋒刀常坦坦。假饒毒藥也閑閑。我師得見然燈佛。多劫曾為忍辱僊。幾迴生。幾迴死。生死悠悠無定止。自從頓悟了無生。於諸榮辱何憂喜。入深山。住蘭若。岑峯幽邃長松下。優遊靜坐野僧家。闐寂安居實蕭灑。覺即了。不施功。一切有為法不同。住相布施生天福。猶如仰箭射虛空。勢力盡。箭還墜。招得來生不如意。爭似無為實相門。一超直入如來地。但得本。莫愁末。如淨琉璃含寶月。既能解此如意珠。自利利他終不竭。江月照。松風吹。永夜清宵何所為。佛性戒珠心地印。霧露雲霞體上衣。降龍鉢。解虎錫。兩股金環鳴歷歷。不是標形虛事持。如來寶

杖親蹤跡。不求真。不斷妄。了知二法空無相。無相無空無不空。即是如來真實相。心鏡明。鑒無礙。廓然瑩徹周沙界。萬象森羅影現中。一顆圓明非內外。豁達空。撥因果。漭漭蕩蕩招殃禍。棄有著空病亦然。還如避溺而投火。捨妄心。取真理。取捨之心成巧偽。學人不了用修行。真成認賊將為子。損法財。滅功德。莫不由斯心意識。是以禪門了却心。頓入無生知見力。大丈夫。秉慧劍。般若鋒。今金剛。非但能摧外道心。早曾落却天魔膽。震法雷。擊法鼓。布慈雲。今灑甘露。龍象蹴蹋潤無邊。三乘五性皆惺悟。雪山肥膩更無雜。純出醍醐我常納。一性圓通一切性。一法徧含一切法。一月普現一切水。一切水月一月攝。諸佛法身入我性。我性還共如來合。一地具足一切地。非

色非心非行業。彈指圓成八萬門。剎那滅却阿鼻業。一切數句非數句。與吾靈覺何交涉。不可毀。不可讚。體若虛空勿涯岸。不離當處常湛然。覓則知君不可見。取不得。捨不得。不可得中只麼得。默時說。說時默。大施門開無壅塞。有人問我解何宗。報道摩訶般若力。或是或非人不識。逆行順行天莫測。吾早曾經多劫修。不是等閑相誑惑。建法幢。立宗旨。明明佛敕曹谿是。第一迦葉首傳燈。二八代西天記。法東流。入此土。菩提達磨為初祖。六代傳衣天下聞。後人得道無窮數。真不立。妄本空。有無俱遣不空空。二十空門元不著。一性如來體自同。心是根。法是塵。兩種猶如鏡上痕。痕垢盡除光始現。心法雙亡性即真。嗟末法。惡時世。眾生福薄難調制。去聖遠兮邪見

深·魔強法弱多怨害。聞說如來頓教門·恨不滅除令瓦碎。  
作在心·殃在身。不須怨訴更尤人。欲得不招無間業·莫  
謗如來正法輪。栴檀林·無雜樹。鬱密深沉師子住。境靜  
林閑獨自遊·走獸飛禽皆遠去。師子兒·眾隨後。三歲即  
能大哮吼。若是野干逐法王·百年妖怪虛開口。圓頓教·  
勿人情。有疑不決直須爭。不是山僧逞人我·修行恐落斷  
常坑。非不非·是不是。差之毫釐失千里。是即龍女頓成  
佛·非即善星生陷墜。吾早年來積學問·亦曾討疏尋經論。  
分別名相不知休·入海算沙徒自困。却被如來苦訶責。數  
他珍寶有何益。從來踏蹬覺虛行·多年枉作風塵客。種性  
邪·錯知解。不達如來圓頓制。二乘精進勿道心·外道聰  
明無智慧。亦愚癡·亦小駸。空拳指上生實解。執指為月

枉施功·根境法中虛捏怪。不見一法即如來·方得名為觀  
自在。了即業障本來空·未了還須償宿債。飢逢王饑不能  
餐。病遇醫王爭得差。在欲行禪知見力·火中生蓮終不壞。  
勇施犯重悟無生·早時成佛於今在。師子吼·無畏說。深  
嗟懵懂頑皮靱。只知犯重障菩提·不見如來開祕訣。有二  
比丘犯姪殺·波離螢光增罪結。維摩大士頓除疑·還同赫  
日銷霜雪。不思議·解脫力。此即成吾善知識。四事供養  
敢辭勞·萬兩黃金亦銷得。粉骨碎身未足酬·一句了然超  
百億。法中王·最高勝。河沙如來同共證。我今解此如意  
珠·信受之者皆相應。了了見·無一物。亦無人·亦無佛。  
大千世界海中漚·一切聖賢如電拂。假使鐵輪頂上旋·定  
慧圓明終不失。日可冷·月可熱。眾魔不能壞真說。象駕

崢嶸謾進途·誰見螻蛄能拒轍。大象不遊於兔徑·大悟不  
拘於小節。莫將管見謗蒼蒼·未了吾今為君決。

中華民國八十六年元月恭印一千本

# 六祖大師法寶壇經

出版者：觀音山 玉佛寺

地址：南投縣埔里鎮觀音路87號

電話：(〇四九)九一二一五五—七

劃撥帳戶：〇二三四二七六七

戶名：香光精舍

結緣處：觀音山 玉佛寺

版藏玉佛寺 歡迎翻印·功德無量

## 結緣品

敬請 南無阿彌陀佛·求生淨土  
常念 南無觀音菩薩·消災降福

普為出資及誦誦受持  
輾轉流通者回向偈曰

願以此功德 消除宿現業  
增長諸福慧 圓成勝善根  
所有刀兵劫 及與饑饉等  
悉皆盡滅除 人各習禮讓  
讀誦受持人 輾轉流通者  
現眷咸安樂 先亡獲超昇  
風雨常調順 人民悉康寧  
法界諸含識 同證無上道